



BAB 1 PENDAHULUAN

1.1 Pengenalan kepada Kajian Pengesanan Graduan KPM

Kajian Pengesanan Graduan Kementerian Pendidikan Malaysia (KPM) mula dijalankan pada tahun 2006 bertujuan meninjau apa yang dilakukan oleh graduan IPT negara, sama ada bekerja, melanjutkan pengajian atau masih aktif mencari pekerjaan menjelang musim konvokesyen masing-masing. Kaji selidik ini dijalankan secara atas talian dan memberi tumpuan kepada graduan peringkat diploma dan ke atas. Walaupun begitu, semua graduan peringkat sijil IPTA, politeknik dan kolej komuniti turut menyertai kajian ini. Di samping terdapat ramai graduan peringkat sijil IPTS yang turut menyertai kajian ini.

Maklumat yang dibekalkan dalam laporan ini adalah berdasarkan kepada maklumat yang telah dibekalkan oleh IPT terlibat dan maklumat yang diperolehi daripada para graduan yang memberi respons kepada kaji selidik tahun 2013. Hasil kajian berkaitan status pekerjaan dan maklumat pekerjaan hanya memberi gambaran status pekerjaan mereka ketika kaji selidik dijalankan dan tidak memberi gambaran status pekerjaan graduan selepas itu. Tempoh antara tamat pengajian dan tarikh IPT mengadakan majlis konvokesyen adalah berbeza-beza, majoritinya adalah dalam tempoh enam bulan. Walaupun begitu, terdapat juga tempoh antara tahun tamat pengajian dan konvokesyen melebihi satu tahun.

Bagi melihat status pekerjaan graduan dalam jangka masa lebih panjang, KPM telah mewujudkan satu lagi sistem yang dikenali sebagai SKPG 1-Kemas Kini Status Pekerjaan. Sistem ini membenarkan para graduan mengemaskini status pekerjaan mereka pada bila-bila masa apabila status pekerjaan mereka berubah. Sistem ini diguna pakai bermula pada tahun 2014 bagi menggantikan Sistem SKPG II yang dijalankan setiap dua hingga tiga tahun bagi meninjau status graduan selepas enam bulan tamat pengajian.

1.2 Metodologi Kajian

Kajian Pengesanan Graduan KPM dijalankan secara atas talian melalui satu sistem yang dikenali sebagai SKPG I. Data asas berkaitan para graduan yang layak menghadiri majlis konvokesyen IPT masing-masing dibekalkan oleh IPT berkenaan sebelum sistem dibuka kepada para graduan untuk menjawab soalan kajian yang dimuatkan. Lazimnya, sistem dibuka untuk para graduan menjawab adalah sekitar tiga minggu sebelum mereka hadir ke majlis konvokesyen dan kemudiannya ditutup seminggu selepas itu. Bagaimanapun, IPT boleh menyesuaikan tarikh sistem dibuka dan ditutup atas keperluan IPT masing-masing.

Soal selidik kajian ini dipaparkan dalam laman web 'graduat.moe.gov.my' dan boleh dicapai oleh graduan yang berkonvokesyen mengikut IPT masing-masing.

1.3 Struktur Soal Selidik Kajian Pengesanan Graduan 2013

Terdapat tujuh bahagian dalam soal selidik. **Bahagian A** merupakan maklumat latar belakang asas dan akademik para graduan yang dibekalkan oleh IPT masing-masing. Bagi tahun 2013, beberapa maklumat tambahan telah dibekalkan oleh IPT, iaitu jenis kecacatan OKU, alamat, daerah, poskod dan negeri tetap graduan. Responden hanya perlu mengemaskini maklumat asas, jika terdapat perubahan keaktifan aktiviti kokurikulum, maklumat latihan industri sekiranya berkaitan, maklumat sosioekonomi keluarga dan cabaran yang dihadapi bagi graduan OKU semasa belajar dan semasa bekerja.

Bahagian B mengandungi soalan penilaian graduan terhadap IPT masing-masing, iaitu berkaitan kemudahan prasarana, perkhidmatan dan sistem pengajian yang disediakan oleh IPT. Di samping itu, bahagian ini juga meninjau persepsi umum responden terhadap tenaga pengajar serta kemahiran dan pengetahuan yang telah mereka perolehi dari sistem pengajian yang telah mereka lalui. Satu soalan telah ditambah bagi kajian 2013 iaitu adakah ijazah/diploma/sijil yang diperolehi setimpal/berbaloi berbanding masa dan wang ringgit yang telah dibelanjakan.

Soalan dalam **bahagian C** pula bertujuan untuk mendapatkan pandangan graduan tentang sejauh mana sistem pengajian yang telah mereka ikuti dapat membangunkan diri mereka bagi menghadapi cabaran dunia pekerjaan.

Bahagian D adalah berkaitan maklumat pengajian yang diikuti oleh graduan yang melanjutkan pengajian setelah tamat pengajian. Manakala **bahagian E** menjurus kepada soalan berkaitan status pekerjaan terkini, sama ada bekerja sepenuh masa atau bekerja separa masa, tidak bekerja atau lain-lain.

Soalan berkaitan pekerjaan graduan seperti kumpulan pekerjaan utama, taraf dan sektor pekerjaan serta pendapatan bulanan graduan adalah dimuatkan dalam **bahagian F**. Pada tahun 2013, beberapa soalan telah ditambah pada bahagian bekerja sendiri. Soalan yang ditambah adalah (i) Adakah syarikat anda berdaftar dengan Suruhanjaya Syarikat Malaysia (SSM); (ii) Tahun penubuhan syarikat; (iii) Saiz organisasi (bilangan staf); (iv) Jumlah modal memulakan perniagaan; (v) Berapakah pendapatan kasar tahunan anda sekarang dan (vi) Cabaran yang anda hadapi dalam memulakan perniagaan. Bagi sumber modal perniagaan, responden boleh membuat pilihan sehingga tiga jenis sumber modal.

Manakala soalan dalam bahagian G pula dikhususkan kepada graduan yang belum bekerja. Bagi tahun 2013, terdapat dua soalan tambahan untuk bahagian ini, iaitu kriteria yang anda guna bagi memilih pekerjaan (PILIH mengikut keutamaan anda) dan gaji yang mereka harapkan.

1.4 Penyertaan IPT dalam Kajian Pengesanan Graduan KPM 2013

Sebanyak 307 buah IPT telah menyertai Kajian Pengesanan Graduan KPM pada tahun 2013 berbanding 274 IPT pada tahun 2012. Kesemua IPTA, politeknik dan kolej komuniti yang mengeluarkan graduan pada 2013 telah menyertai kajian ini, iaitu 20 buah IPTA, 25 buah politeknik dan 65 kolej komuniti. Pada tahun 2013, KUTAR telah bertukar status menjadi IPTS. Dengan itu, statistik berkaitan graduan KUTAR dilaporkan bersama IPTS yang lain. Pertambahan bilangan kolej komuniti adalah disebabkan semua kolej komuniti bertaraf cawangan telah dinaiktaraf menjadi kolej komuniti utama. Bagi IPTS pula, sebanyak 187 buah telah menyertai kajian pada tahun tersebut dan sebanyak 10 buah IPT lain turut menyertai kajian pada tahun 2013.

Senarai IPT yang mengambil bahagian dalam kaji selidik 2013 diterakan pada **Lampiran 1**.

1.5 Susunan Buku Laporan 2013

Fomat laporan 2013 ini diteruskan seperti tahun-tahun sebelumnya, iaitu dalam bentuk grafik dan jadual lengkap. Ini bagi memudahkan pemegang taruh dan pihak-pihak berkepentingan memahami kandungan dapatan kajian ini. Terdapat tujuh bab keseluruhannya, iaitu **Bab 1** adalah pendahuluan yang merangkumi struktur soal selidik, penyertaan IPT dalam kajian ini dan profil graduan. **Bab 2** memaparkan corak keluaran graduan mengikut IPT, peringkat pengajian, kewarganegaraan dan jantina bagi IPTA, IPTS, politeknik, kolej komuniti dan IPT lain.

Bab 3 memberi fokus kepada status pekerjaan graduan mengikut peringkat pengajian secara lebih terperinci. Manakala **Bab 4** adalah maklumat pekerjaan bagi graduan yang bekerja seperti kumpulan pekerjaan, taraf dan sektor pekerjaan, pendapatan bulanan serta sektor ekonomi.

Maklumat graduan 2013, termasuk graduan antarabangsa yang melanjutkan pengajian seurus tamat pengajian dipaparkan dalam **Bab 5**. Seterusnya **Bab 6** mengandungi maklumat graduan yang belum bekerja, iaitu sebab belum bekerja, kadar belum bekerja mengikut bidang pengajian, peringkat pengajian dan sebagainya.

Bab 7 mengandungi laporan berkaitan keluaran dan maklumat pekerjaan graduan (warganegara) bagi kumpulan berfokus, iaitu graduan yang bekerja sendiri, graduan Orang Kurang Upaya (OKU) dan graduan berketurunan Orang Asli.

Pada bahagian awal laporan ini turut disisipkan trend keluaran dan status pekerjaan dalam tempoh lima tahun kebelakangan ini, iaitu dari tahun 2009 hingga 2013 agar para pembaca mendapat perspektif yang lebih jelas tentang kebolehdapatan kerja para graduan semasa konvokesyen.

1.6 Kadar Respons Kaji Selidik 2013

Kadar respons bagi tahun 2013 ialah 85.0 peratus, iaitu seramai 220,912 orang daripada 259,510 graduan telah memberi respons kepada kajian ini. Kadar respons ini meningkat sebanyak 1.0 peratus berbanding tahun sebelumnya. Mengikut kategori IPT, kadar respons tertinggi dicatat oleh graduan kolej komuniti, iaitu sebanyak 93.4 peratus, diikuti IPTA (92.2 peratus), politeknik sebanyak 85.5 peratus, IPT lain (77.4 peratus) dan IPTS sebanyak 75.3 peratus. Kadar respons bagi setiap IPT adalah seperti dalam **Lampiran 1**.